



## KOMISIONI QENDROR I ZGJEDHJEVE

### KOMISIONERI SHTETËROR I ZGJEDHJEVE

Fjala e Komisionerit Shtetëror të Zgjedhjeve, z. Ilirjan Celibashi në Seancë Plenare të Kuvendit të Shqipërisë mbi veprimtarinë e Komisionit Qendror të Zgjedhjeve gjatë vitit 2020.

*I nderuar Kryetar,  
të nderuar deputetë,*

#### [ I ]

Veprimtaria e KQZ për vitin 2020 ka qënë e varur dhe e lidhur ngushtë nga/dhe prej zhvillimeve politike në kuadër të ndryshimeve të Kodit Zgjedhor, të finalizuara këto ndryshimeve vetëm në tetor të vitit në fjalë.

Pasiguria dhe pritshmëria në lidhje me ndryshimet e diskutuara të ligjit zgjedhor, përgjatë pjesës së parë të vitit 2020, përcaktuan edhe shkallën e angazhimit të KQZ-së në kuadër të përgatitjeve për zgjedhjet për Kuvend të vitit 2021.

Ashtu si edhe për institucione të tjera të vendit dhe në përgjithësi për sistemin tonë shtetëror dhe shoqërinë në tërësi, fillimi i vitit 2020 u shoqërua me një periudhë të reduktimit të aktivitetit administrativ të KQZ-së për shkak të masave ndaluese, të lëvizjes dhe të pranisë në zyrë, të vendosura për shkak të pandemisë.

Në veprimtarinë e saj gjatë vitit 2020, KQZ ka mbajtur në konsideratë kërkesat e Kuvendit të Shqipërisë të miratuara në Rezolutën e tij për Vlerësimin e Veprimtarisë së Komisionit Qendror të Zgjedhjeve për vitin 2019.

**Nëpërmjet kësaj rezolute** Kuvendi i kërkoi KQZ-së që gjatë vitit 2020:

*“Të miratojë program pune të posaçëm për vitin në vazhdim duke konsideruar që viti në vazhdim nuk është vit zgjedhor dhe në këto kushte ai duhet t’i shërbejë institucionit dhe administratës për organizimin dhe plotësimin e veprimtarive që janë të pamundura në një vit zgjedhor”.*

Në përmbushje të kësaj kërkesë KQZ, me shpalljen e dekretit të Presidentit të Republikës nr. 11700, datë 06.09.2020, “Për caktimin e datës së zgjedhjeve për Kuvendin”, ka hartuar program pune për vitin 2020 dhe 2021 me qëllim planifikimin e aktiviteteve që do t’i parapranin organizimit të Zgjedhjeve për Kuvendin të datës 25 prill 2021.

**Po sipas Rezolutës, KQZ-së ju kërkua:**



*“Të përditësojë dhe të përmbyllë databazën me të dhënat për shtetasit që në vite kanë qenë pjesë e administratës zgjedhore dhe në analizë të të dhënave të përpunohë relacion me konkluzione përmbyllëse që dalin nga shqyrtimi i tyre, duke trajtuar çështjen nga këndvështrimi historik i sjelljes politike të subjekteve zgjedhore gjatë proceseve zgjedhore”.*

Në zbatim të kësaj kërkese, KQZ e ka përditësuar bazën e të dhënave për shtetasit që në vite kanë qenë pjesë e administratës zgjedhore dhe ka analizuar në këndvështrim historik sjelljen politike të subjekteve zgjedhore gjatë proceseve zgjedhore.

Numri i konsiderueshëm i zëvendësimeve të komisionerëve, praktikë e cila tashmë është një trend i konsoliduar, lëkund besimin e publikut në paanshmërinë e administrimit të procesit zgjedhor. Zëvendësimi i anëtarëve dhe sekretarëve të KZAZ-ve, edhe në ditën e zgjedhjeve, kur KQZ ka përmbyllur kalendarin e trajnimeve, çënon mirëadministrimin e procesit. Kjo sjellje, e përsëritur në të gjithë proceset zgjedhore, bën të pamundur zbatimin rigoroz të Kodit Zgjedhor.

Numri i zëvendësimeve të anëtarëve dhe sekretarëve të KZAZ-ve me kërkesë të partive politike, paraqitet si më poshtë:

146 ose **28%**, në zgjedhjet për Kuvendin **2009**;

140 ose **26%**, në zgjedhjet vendore **2011**;

253 ose **36%**, në zgjedhjet për Kuvendin **2013**;

271 ose **38%**, në zgjedhjet vendore **2015**;

131 ose **18%**, në zgjedhjet për Kuvendin **2017**;

108 ose **18%**, në zgjedhjet vendore **2019** (*Shifrat i referohen vetëm subjektit zgjedhor që paraqiti propozime për anëtarë dhe sekretarë të KZAZ-ve*).

Gjithashtu propozimet e subjekteve zgjedhore për anëtarëve të administratës zgjedhore të nivelit të tretë (KQV dhe GNV), jashtë afateve ligjore çënojnë organizimin, administrimin dhe mbarëvajtjen e procesit zgjedhor.

Referuar të dhënave, rezulton se rreth 50 % e anëtarëve të KQV ushtrojnë detyrën pa u trajnuar. Mosnjohja e procedurave përbën shkak për shkelje të ligjit, mosmarrëveshje mes komisionerëve për zbatimin e procedurave, vonesa në hapjen e qendrave të votimit, vonesa në fillimin e votimit, madje edhe me pezullim të votimit për të korrigjuar parregullsitë e shkaktuara në administrimin e



materialit zgjedhor nga komisionerë të patrajnuar.

Më shumë problematike paraqitet sjellja e subjekteve zgjedhore sa i përket propozimeve të anëtarëve të grupeve të numërimit të votave. Emërimet e tyre përgjithësisht kryhen para fillimit apo dhe gjatë procesit të numërimit të votave. Për shkak të emërimeve të vonuara, trajnimi i anëtarëve të GNV kryhet përgjithësisht para fillimit të procesit të numërimit, në VNV, në kohë të kufizuar dhe atmosferë jo të qetë. Kjo situatë ka cënuar profesionalizmin e numëruesve, duke sjellë problematika në proces, të cilat përbëjnë shkak edhe për debate, zgjatje të panevojshme të tij, mosplotësimin e dokumentacionit, etj.

Në lidhje me sjelljen e subjekteve zgjedhore sa i përket raportit gjinor në propozimet për anëtarët e administratës zgjedhore nga të dhënat që KQZ ka, rezulton:

Në komisionet e nivelit të dytë (KZAZ), për shkak të kuotës gjinore të përcaktuar në Kodin Zgjedhor, përfaqësimi i grave shënon tendencë në rritje.

Partitë politike që kanë detyrimin e kuotës gjinore në propozimet për anëtarë të KZAZ-ve, e respektojnë atë. Megjithatë, ky përcaktim, nuk realizon përfaqësimin 30% të grave në çdo KZAZ.

Për nivelin e tretë të administratës zgjedhore, KQV, GNV sjellja e partive politike dëshmon probleme lidhur me qasjen ndaj gjinisë më pak të përfaqësuar. Kjo për arsye se Kodi Zgjedhor nuk përcakton detyrim për kuotë gjinore për komisionet e qendrave të votimit dhe grupet e numërimit të votave.

Në zgjedhjet vendore 2015, nuk kishte asnjë grua në përbërjen e 51% e KQV. 40 % e KQV kishin përfaqësim të grave nën 30%, dhe vetëm 9% e KQV kishin përfaqësim të grave mbi 30 %. Në zgjedhjet për Kuvend 2017, gratë përbënin 15.5 % të anëtarëve të komisioneve të qendrave të votimit, dhe 12.2% të anëtarëve të Grupeve të Numërimit të Votave.

Në rezolutë Kuvendi i kërkon KQZ-së:

*“Të vijojë zbatimin e drejtë dhe me referim në dispozitat ligjore të ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike”*

Në lidhje me këtë rekomandim, KQZ, tashmë ka rritur standartin në vlerësimin e çështjeve që lidhen me zbatimin e ligjit 138/2015 “Për garantimin e integritetit të personave që zgjidhen, emërohen ose ushtrojnë funksione publike”.



Në Rezolutë Kuvendi i kërkon KQZ-së:

*“të miratojë Kodin Etik të institucionit në funksion edhe të përcaktimit të rregullave të përfaqësimit në publik të institucionit dhe të daljeve publike të anëtarëve të KQZ-së, në përputhje me Manualin e Monitorimit Vjetor dhe Periodik, të miratuar me vendim Kuvendi”.*

Në lidhje me këtë kërkesë, theksojmë se zhvillimet politike që shoqëruan ndryshimet në Kodin Zgjedhor me marreveshjen e Këshillit Politik, ndryshimi i arkitekturës drejtuese të KQZ-se, konstituimi i organeve të reja 3-mujorin e fundit të vitit 2020 ndikuan në vonimin e procesit të hartimit dhe miratimit të Kodit Etik. Hartimi i këtij akti është përfshirë në planin e punës së Komisionit Qendror të Zgjedhjeve për vitin 2021.

Në Rezolutë Kuvendi i kërkon KQZ-së:

*“të zbatojë në praktikë rregullat e miratuara të kontrollit dhe verifikimit të shpenzimeve të financimeve të partive politike dhe fushatave elektorale.*

Në vlerësim të kësaj kërkesë, përgjatë vitit 2020 KQZ ka përmbushur detyrimet në përputhje me ligjin.

## [ II ]

**Veprimtaria e KQZ përgjatë vitit 2020** ishte intensive, vetëm pas hyrjes në fuqi të ndryshimeve të KZ, si dhe pas rikonfigurimit të këtij institucioni në tetor 2020.

Në tërësi veprimtaria e KQZ për vitin 2020 mundet të ndahet në dy periudha:

### **1. Veprimtaria e zhvilluar nga janari deri në tetor 2020**

Dhe periudha tjetër

### **2. Veprimtaria e zhvilluar nga tetor – 31 dhjetor 2020.**

E bëjmë prezantimin e veprimtarisë së KQZ të ndarë në këto dy periudha edhe për faktin se pas tetorit 2020 KQZ ka një konfigurim tjetër nga ai i para ndryshimeve në KZ, dhe teknikisht ajo përfaqëson një intitucion të ri pas këtyre ndryshimeve.

Sikurse ju e dini, tashmë KQZ është një organ që përbëhet nga tre struktura/organe drejtuese: Komisioneri Shtetëror i Zgjedhjet; Komisioni Rregullator dhe Komisioni i Ankimeve dhe Sanksioneve.



## **D). Veprimtaria e zhvilluar nga janari deri në tetor 2020.**

Kjo veprimtari, krahas të tjerave kryesisht konsiston edhe në trajtimin e aspekteve postzgjedhore të zgjedhjeve për organet e qeverisjes vendore të vitit 2019, sikurse janë vlerësimi mbi raporteve monitoruese dhe financiare, dekriminalizimi, etj.

### **[1].**

Në fakt pjesën më të madhe të aktivitetit të KQZ për këtë periudhë e zënë aktet që kanë të bëjnë me të ashtuquajturin proces të dekriminalizimit.

Nga KQZ janë marrë vendime që kanë të bëjnë me verifikimin e formularëve të vetëdeklarimit të kandidatëve të listave shumemërore të anëtarëve të këshillave bashkiak për shkak të vakancave të krijuara në këto këshilla.

Janë rreth 13 vendime të marra nga KQZ në lidhje me verifikimin e përputhshmërisë së zgjedhjes dhe/ose të plotësimit të vakancave të anëtarëve të këshillave bashkiak.

Në zbatim të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publik”, KQZ ka miratuar edhe 3 (tre) vendime për shqyrtimin e rezultatit të verifikimit të Prokurorisë së Përgjithshme për disa funksionarë publik.

Brenda afateve të përcaktuara ligjore, në tërësi për vitin 2020 KQZ ka administruar 83 (tetëdhjetë e tre) formularë vetëdeklarimit për zëvendësimin e vakancave të krijuara në këshillat bashkiak.

KQZ ka përfunduar verifikimin e 72 (shtatëdhjetë e dy) kandidatëve nga të cilët 39 kandidatë janë të gjinisë mashkullore dhe 33 candidate janë të gjinisë femërore.

Për shqyrtimin e rezultateve të verifikimit referuar më lart, KQZ përgjatë vitit 2020 ka miratuar 26 (njëzetë e gjashtë) vendime. Komisioni Qendror i Zgjedhjeve për këto raste ka konstatuar se kandidatët për anëtarë në këshillat bashkiak nuk janë në kushtet e moszgjedhshmërisë dhe ka plotësuar vakancat në këshillat bashkiakë.

Përgjatë vitit 2020 kanë refuzuar depozitimin e formularit të vetëdeklarimit për vazhdimin e procedurave të mëtejshme të verifikimit 38 (tridhjetë e tetë) kandidatë të listave shumemërore të subjekteve të ndryshme politike.

Lidhur me shqyrtimet e rezultateve të verifikimeve të Prokurorisë së Përgjithshme për vitin 2020, KQZ ka administruar rezultatet e verifikimit të thelluar nga Prokuroria e Përgjithshme, për 4 (katër) raste.

Komisioni Qendror i Zgjedhjeve për 1 (një) rast ka vendosur shpalljen e pavlefshmërisë dhe përfundimin e parakohshëm të mandatit për anëtarin e këshillin bashkiak, për 1 (një) rast ka vendosur se anëtari i Këshillit të Bashkisë nuk përfshihet në kushtet e ndalimit të parashikuar nga ligji nr. 138/2015 dhe për 2 (dy) raste ka deklaruar të përfunduar procedurën administrative pa vendim përfundimtar për shkak të dorëheqjes së funksionarëve publikë.

## [2].

Disa nga aktet e tjera të rëndësishme që KQZ ka miratuar gjatë periudhës së gjysmës së parë të vitit 2020 janë edhe ato që kanë të bëjnë me:

1). vendimin nr. 4 datë 21.02.2020 “Për miratimin e mënyrës së asgjësimit të fletëve të votimit, administrimin e dokumentacionit zgjedhor dhe shpenzimeve buxhetore për hapjen e kutive të votimit dhe kutive të materialeve zgjedhore të përdorura në zgjedhjet për organet e qeverisjes vendore, të datës 30.06.2019”;

2). vendimin nr. 5, datë 10.03.2020 “Për miratimin e strukturës së shpenzimeve buxhetore për Komisionin Qendror të Zgjedhjeve për vitin 2020”;

3). vendimin “Për shpërndarjen e fondeve vjetore partive politike në formën e ndihmës financiare vjetore për vitin 2020”, marrë në zbatim të ligjit nr. 8580, “Për Partitë Politike”, të ndryshuar.

Në zbatim të ligjit nr. 54/2019 “Për nismën ligjvënëse të zgjedhësve në Republikën e Shqipërisë”, KQZ ka shqyrtuar kërkesat e depozituara nga komitetet nismëtare dhe ka marrë 3 (tre) vendime për miratimin dhe shpërndarjen e fletës tip sipas kërkesave të komiteteve nismëtare:

1). për propozimin e projektligjit “Për referendumet në Republikën e Shqipërisë”;

2). për propozimin e projektligjit “Për disa shtesa dhe ndryshime në ligjin nr.7895, datë 27.01.1995, Kodi Penal i Republikës së Shqipërisë”, i ndryshuar dhe

3). për propozimin e projektligjit “Për krijimin e regjistrit kombëtar të autorëve të krimeve seksuale.

[3].

Pjesë e aktivitetit të KQZ për vitin 2020 dhe kryesisht e periudhës së parë të këtij viti janë edhe administrimi nga ky institucion i raporteve financiare vjetore të partive politike.

Në zbatim të Ligjit “Për partitë politike”, i ndryshuar, partitë politike dorëzojnë në KQZ raportet vjetore financiare.

Nga 128 parti politike të regjistruara në Gjykatën e Rrethit Gjyqësor Tiranë, kanë dorëzuar raportet financiare vjetore në KQZ, vetëm 26 parti politike.

Më 30 qershor 2019 u zhvilluan zgjedhjet për organet e qeverisjes vendore.

Gjatë periudhës prill-qershor 2019, u regjistruan si subjekt zgjedhor gjithsej 36 parti politike dhe 16 kandidatë të mbështetur nga zgjedhësit.

KQZ emëroi 34 auditues ligjorë, të cilët do të kryejnë monitorimin dhe auditimin e fondeve dhe shpenzimeve të fushatës zgjedhore për zgjedhjet e organeve vendore të vitit 2019 (vendimi i KQZ-së nr.740, datë 31.05.2019).

Ekspertët financiar kishin detyrimin të depozitonin në KQZ çdo javë raportet e ndërmjetme për rezultatet e monitorimit të fushatës zgjedhore.

22 parti nga 36 parti që ishin regjistruar si subjekt zgjedhor në zgjedhje, dorëzuan në KQZ raport financiar për fushatën zgjedhore.

Ekspertët financiar kanë depozituar në KQZ 35 raporte të monitorimit përfundimtar të fushatës zgjedhore.

Audituesit kanë certifikuar financimin e fushatës zgjedhore për 35 parti politike.

KQZ administroi raportet e auditimit dhe raportet e auditimit të audituesve ligjorë, dhe përgatiti materialin mbi bazën e opinionit të shprehur prej tyre.

Në përfundim të procesit të verifikimit të raporteve të auditimit të fondeve të përfituara dhe të



shpenzuara nga partitë politike për vitin 2019, rezultoi se:

14 parti e kanë dorëzuar brenda afatit dhe 9 parti politike e kanë dorëzuar jashtë afatit ligjor.

13 parti politike, Partia Partia G-99, Partia Demokratike për Integrim dhe Prosperitet, Partia Pajtimit Kombëtar, Partia Reformave Demokratike Shqiptare, Partia e të Drejtave të Mohuara, Partia Uniteti Kombëtar, Partia Lëvizja Punëtore Shqiptare, Partia për Mbrojtjen e të Drejtave të Emigrantëve, Partia Socialpunëtore Shqiptare, Partia Aleanca Demokristiane Shqiptare, Partia Aleanca Kuq e Zi, Partia Kombëtare Konservatore Albania, Partia Emigracionit Shqiptar, nuk kanë dorëzuan raportin financiar në KQZ.

[4].

#### **Në lidhje me buxhetin.**

Me ligjin nr.88/2019 “Për buxhetin e vitit 2020”, KQZ i janë caktuar fonde në programin Planifikim, Menaxhim dhe Administrim, për vitin në shumën 133.100.000 lekë. Detajimi i zërave të buxhetit është bërë në funksion të pëmbushjes së detyrave të strukturave të administratës të KQZ-së, bazuar në realizimin e buxhetit gjatë viteve të kaluara.

Struktura e shpenzimeve buxhetore ka qënë:

shpenzime për paga 86 milionë lekë, shpenzime për sigurime 16.3 milionë lekë, shpenzime për mallra dhe shërbime 29.76 milionë lekë, transfertat korrente të huaja 300 mijë lekë, transfertat për buxhetet familjare dhe individët 240 mijë lekë, investime 500 mijë lekë.

Me Aktin Normativ nr.15, date 15.04.2020 “Për disa shtesa dhe ndryshime në ligjin nr.88/2019 Për buxhetin e vitit 2020” u bë rishikimi i buxhetit të vitit 2020, ku u bënë pakësimet në zërat e mëposhtëm;

- shpenzime për paga 3 milionë lekë,
- shpenzime për sigurime 1 milionë lekë,
- shpenzime për mallra dhe shërbime 3 milionë lekë

#### **II). Veprimtaria e zhvilluar nga tetor – 31 dhjetor 2020.**

Më së shumti gjatë kësaj periudhe veprimtaria e KQZ-së lidhet me përgatitjet intensive për zgjedhjet e 25 prillit 2021.



Në vlerësim të ndryshimeve të Kodit Zgjedhor, KQZ hartoi një plan veprimi në kuadër të përgatitjeve për këto zgjedhje. Ky plan veprimi konsiston në numrin dhe llojin e akteve që KQZ do të duhej të miratonte në bazë dhe për zbatim të Kodit Zgjedhor, si dhe në veprimtari të tjera që KQZ do të duhej të zhvillonte po në kuadër të zgjedhjeve të 25 prillit, por jo vetëm.

Ndryshimet e shumta të Kodit Zgjedhor (të cilat ju i dini dhe unë nuk po ndalem ti listoj), të bëra vetëm 7 muaj përpara datës së zgjedhjeve, diktuan detyra të shtuara për KQZ në një periudhë shumë të shkurtër kohore, duke gjeneruar kështu një dinamizëm më të lartë të procesit administrativ.

Pas shpalljes së dekretit të Presidentit të Republikës së Shqipërisë, nr. 11700, datë 06.09.2020, për caktimin e datës 25 Prill 2021, si datë për zhvillimin e zgjedhjeve për Kuvendin, u krijuan dhe konstituan organet e reja drejtuese të KQZ-së të cilat udhëheqin aktivitetin e saj administrativ dhe rregullator në funksion të organizimit, administrimit dhe kontrollit të procesit zgjedhor.

Në këtë periudhë dhe kryesisht gjatë gjithë procesit përgatitor të zgjedhjeve të 25 prillit dhe zhvillimit të tyre, veprimtaria e KQZ ishte tërësisht transparente, bashkëpunuese me të gjithë faktorët politik dhe institucional të angazhuar dhe të interesuar për zgjedhet, si parti politike, media, shoqëri civile, institucione dhe organizata ndërkombëtare, etj.

#### [1].

Për shkak të ndryshime ligjore, KQZ u përballë me një sfidë me kohën për të miratuar në zbatim të kërkesave të reja ligjore akte nënligjore të shumta të cilat do të rregullonin marrëdhënie të caktuara për herë të parë, si dhe të rishikonin aktet në fuqi si pasojë e ndryshimeve në ligj ose nevojave të lindura nga praktikatat e mëparshme zgjedhore, apo që diktohen nga rekomandimet e OSBE/ODIHR për zgjedhjet.

Komisioni Qendror i Zgjedhjeve përgjatë aktivitetit të tij në hartimin e projektakteve u udhëhoq nga parimi i ligjshmërisë, transparencës, efencës dhe efikasitetit duke reduktuar numrin e akteve të hartuara dhe duke rritur cilësinë e tyre.

Gjatë periudhës tetor – dhjetor 2020 organet e reja drejtuese të KQZ-së kanë miratuar 54 akte nënligjore.



Komisioneri Shtetëror i Zgjedhjeve ka miratuar përgjatë kësaj periudhe 40 vendime dhe 1 udhëzim.

Nga këto vendime 22 vendime janë marrë në zbatim të ligjit 138/2015, 15 vendime në funksion të organizimit të zgjedhjeve të datës 25 prill 2021 dhe 2 vendime administrative për shtyrjen e afatit të nënshkrimeve të komiteteve nismëtare në zbatim të ligjit nr. 54/2019 “Për nismën ligjvënëse të zgjedhësve në Republikën e Shqipërisë”.

Komisioni Rregullator në KQZ ka miratuar 13 akte nënligjore, 11 vendime dhe 2 udhëzime në funksion të organizimit të zgjedhjeve të datës 25 prill 2021.

Ndër vendimarrjet kryesore të Komisionit Rregullator në KQZ përgjatë kësaj periudhe janë:

- 1- Vendim nr. 01, datë 26.10.2020, “Për miratimin e rregullores “Për organizimin dhe funksionimin e Komisionit Rregullator”.
- 2- Vendim nr. 02, datë 31.10.2020, “Për llojin dhe karakteristikat teknike që duhet të plotësojnë sistemet dhe pajisjet e indentifikimit elektronik të zgjedhësve që prokurohen dhe përdoren në zgjedhje në Republikën e Shqipërisë”.
- 3- Vendim nr. 03, datë 06.11.2020, “Për miratimin e rregullores “Për mënyrën e funksionimit dhe zhvillimit të seancave të Komisionit të Ankimimeve dhe Sanksioneve”.
- 4- Vendim nr. 04, datë 13.11.2020, “Për llojin dhe karakteristikat teknike që duhet të plotësojnë sistemet dhe pajisjet e votimit dhe numërimit elektronik që prokurohen dhe përdoren në zgjedhje në Republikën e Shqipërisë”.
- 5- Vendim nr. 05, datë 20.11.2020, “Për miratimin e rregullores për organizimin dhe funksionimin e Komisionit të Zonës së Administrimit Zgjedhor”.
- 6- Vendim nr. 06, datë 30.11.2020, “Për ngritjen e Zonave të Administrimit Zgjedhor për zgjedhjet për Kuvend, të dates 25 prill 2021”.
- 7- Udhëzim nr. 01, datë 05.12.2020, “Përcaktimi i rregullave për ngritjen, caktimin dhe njoftimin e vendndodhjes së qendrave të votimit dhe përgatitjen e hartës së njësisë së vetëqeverisjes vendore për zgjedhjet për Kuvend të dates 25 prill 2021”.
- 8- Udhëzim nr. 02, datë 05.12.2020, “Për caktimin e procedurave të përzgjedhjes dhe trajnimit të shtetasve që mund të emërohen kryesisht për plotësimin e vakancës në KZAZ dhe KQV”.



- 9- Vendim nr. 8, datë 14.12.2020 “Për përdorimin e kamerave regjistruese dhe të monitorëve për shfaqjen e fletëve të votimit ë Vendet e Numërimit të Votave në zgjedhjet për Kuvend, të datës 25 prill 2021”.
- 10- Vendim nr. 9, datë 24.12.2020 “Për rregullat për raportimin e veprimtarive me karakter publik të institucioneve publike, agjencive dhe/ose ndërmarrjeve shtetërore, kategoritë e veprimtarive të ndaluara, si dhe monitorimin e veprimtarisë, sjelljes dhe përdorimit të burimeve njerëzore, financiare dhe logjistike të administratës shtetërore para zgjedhjeve”.
- 11- Vendim nr. 10, datë 24.12.2020 “Për miratimin e rregullave dhe modaliteteve për llogaritjen e vlerës monetare të dhurimeve në natyrë ose shërbimeve, huave dhe kredive për qëllime zgjedhore ose politike të përfituara nga partitë politike dhe kandidatët gjatë fushatës zgjedhore”.
- 12- Vendim nr. 12, datë 30.12.2020 “Për miratimin e rregullave të veprimtarisë së Policisë së Shtetit në shërbim të zgjedhjeve”.

## [2].

Aspektet përgatitore zgjedhore që kishin të bënin me përdorimin e identifikimit elektronik të zgjedhësve, projektin pilot të votimit elektronik, votën e diasporës, kamerat në qendrat e votimit, e në përgjithësi infrastruktura dhe logjistika zgjedhore ishin prioritet e angazhimit të KQZ në kuandër të përgatitjeve për zgjedhjet e 25 prillit të këtij viti.

## [3].

Organizimi i ri i KQZ si institucion me tre organe drejtuese dhe shpërndarja e kompetencave në këto tre organe, diktoi nevojën e riorganizimit të administratës së Komisionit Qendror të Zgjedhjeve, që nënkupton suprimimin e disa njësive, bashkimin, ndarjen apo krijimin e njësive të reja administrative edhe në funksion të ushtrimit të funksioneve të parashikuara nga Kodi Zgjedhor.

Komisioneri Shtetëror i Zgjedhjeve, përgatiti dhe i përcolli për miratim Kuvendit të Shqipërisë strukturën dhe organikën e të administratës së KQZ-së me kohë të plotë pune. Kuvendi me vendim 67/2020 miratoi strukturën organikën dhe klasifikimin e pagave të punonjësve me kohë të plotë pune, gjithsej 85 punonjës, nga të cilët 65 punonjës janë pjesë e shërbimit civil dhe 20 punonjës mbështetës.

Gjithashtu, KQZ ka realizuar rekrutimin e personelit me kohë jo të plotë pune.



#### [4].

Viti 2020, veçanërisht periudha pas rikonfigurimit të këtij institucioni, u karakterizua edhe nga një bashkëpunim, intensiv, eficient e dobiprurës për KQZ, i këtij institucioni me institucione dhe organizata ndërkombëtare me përfaqësi dhe jo në Tiranë.

KQZ është pjesë e International Election Working Group (IEWG), krijuar me iniciativën e Prezencës së OSBE-së, pjesë e të cilit janë përfaqësitë e shteteve anëtare të OSBE-së dhe Organizatat Ndërkombëtare në Shqipëri, të cilat kanë pjesë të aktivitetit të tyre edhe fushën zgjedhore.

Mbledhjet mujore të këtij grupi pune, të krijuar që nga viti 2012, shërbejnë për informimin nga titullari i KQZ-së për veprimtarinë institucionale, problematikat dhe sfidat e ndeshura, koordinimin e projekteve dhe asistencën e partnerëve për realizimin e tyre.

Në kuadër të strukturës horizontale të Këshillit të Evropës / Bashkimit Evropian për Ballkanin Perëndimor dhe Turqinë, projekti "Veprimi kundër Krimin Ekonomik në Shqipëri" kontribuoi në forcimin e legjislacionit për financimin e Partive Politike dhe Fushatat Zgjedhore.

Projekti i realizuar me ekspertizën e KiE dhe NDI dhe mbështetjen financiare të BE dhe Ambasadës Britanike, mbështeti kapacitetet mbikëqyrëse të KQZ-së për kontrollin dhe verifikimin e raporteve financiare të fushatës zgjedhore të subjekteve zgjedhore përmes: hartimit të kuadrit rregullator dhe metodologjik, përkrahjen e KQZ-së në hartimin e akteve nënligjore (udhëzimeve) pas ndryshimeve në Ligjin për Partitë Politike si dhe ngritjes së kapaciteteve të ekspertëve financiarë të KQZ-së me monitorimin e financimit të fushatës zgjedhore në mënyrë efektive.

OSBE koordinoi dhe mbështeti njësr aspektesh përgatitore të këtyre zgjedhjeve për vitin 2020. Po ashtu, ambasada britanike dhe ajo e holandeze ndërmorën angazhime për mbështetje të veprimtarisë së KQZ gjatë vitit 2020 në kuadër të përgatitjeve për zgjedhjet e 25 prillit të këtij viti.

#### [5].

Në kuadër të përgatitjeve për zgjedhjet e këtij viti KQZ koordinoi ngushtë me qeverinë shqiptare dhe në mënyrë të veçantë me Ministrinë e Financave për siguruar financimin e plotë të të gjitha aspekteve teknike dhe logjistike zgjedhore sipas kërkesave të Kodit Zgjedhor.

Në rezultante të këtij koordinimi, buxheti i shtetit financoi tërësisht projektin e identifikimit elektronik të zgjedhësve, projektin pilot të votimit dhe numërimit elektronik në njësinë 10 në Tiranë, vendosjen e kamerave në të gjitha qendrat e votimit, si dhe të gjitha aspektet e tjera kryesore të përgatitjes dhe organizimit të zgjedhjeve të 25 prillit të këtij viti.

**Në përfundim:**

Mundet të thuhet se KQZ gjatë vitit 2020 përmbushi të gjitha detyrimet e ngarkuara nga Kodi për veprimtarinë që ky institucion do të duhej të zhvillonte në këtë vit, kryesisht në kuadër të përgatitjeve për zgjedhjet për Kuvend të 25 prillit 2021.

Faleminderit!